

Ski Team Fascia, no demò agonism

L president Leonardo Bernard fêsc n bilanz de la sajón da d'invern e l reiona ence de l'esperienza di Mondiei Junior e de la ativitèdes extra agonistiches de la sociazion

Sociazions - L'è prest oca de meter via la forniment di sport da d'invern, l'è moment giust per fêr mingol de bilanz de coche la è jita la sajón per la maor sociazion sportiva de noscia val, l Ski Team Fascia. Aon per chest domà fora l president Leonardo Bernard.

President, la sajón da d'invern è beleche fenida, co è la jita chest an?

Leonardo Bernard: "A livel generel la è jita n muie ben, a pèrt vèlch azidest sozedù a vèlch atlet. En particulèr chest an l'è mencià la prezenza de Marta Cincelli, na beza dalbon foeta che per desdita, endèna n alenament amò al scomenz de la sajón, la se à rot la tibia. Marta fêsc pèrt de la categoria Allievi amò per chest an, n auter an la jirà coi Aspiranti, la è ence tel Ski College e l'è dalbon na emprometuda del schi.

L azidest che sozet endèna l alenament dèsc da pòsser: l schi scomenza a doventèr na atività che domà semper più preparazion e donca ge vel meter n muie de atenzion soraldut tel preagonism.

Aboncont, a pèrt chisc fac che amò l'è contratempe de percors da meter en cont, la sajón è stata positiva, desche sozietà podon esser contenc, porton 8 atlec ai Taliegn te la desvaliva categories, Baby, Cuccioli, Ragazzi e Allievi, ma soraldut podon esser contenc per l gran numer de bec che tol pèrt a noscia ativitèdes. Chest aspet ne conforta percheche vel dir che sion credibol tant en cont de l'oferta sporta che per la serietà che meton tel portèr inant l'empegn tout. No desmention che noscia atività è de suport te la crescimonia di bec: duta la sociazion de volontariats deida la families te l'educazion di più joegn, a na vida che i posse crescer con obietives e valores drec."

De chisc tempes l'è semper più complicà se dèr jù te chisc setores...

"L'è apontin chesta consaputa che ne spenc a jir inant, percheche ogne an che passa l'è semper più senester portèr inant vèlch a livel volontaristich, l'è semper più burocrazia, responsabilitèdes, besognes, l livel se auzza semper de più, eneeben che l'è prim pensier del Ski Team no sie tant chel de arjonjer resultac ma l'educazion sportiva di bec, amò l'è chier che canche se fêc agonism ge vel ence portèr a cèsa resultac. Noscia sociazion anter l'auter pel contèr su n grop de maestres e alenadores de valuta, con na bona esperienza vadagnèda ence de gra al fat che i seghita a rodèr ti



L president del Ski Team Leonardo Bernard.

desvalives gropes, per smaorèr la capacità de educèr i bec te sia complessità, dal bez picol a chel più gran, tegnan cont di desvalives besognes e obietives. La struttura tecnica de noscia sociazion è n muie enjignèda e per chest trop aprijèda, l dèc fosc ence con mingol de presunzion, e de chest sion stole. La noscia l'è na realtà che tol ite beleche duta la val, per chest aon l'atenzion de la amministrazions e di impiantisc con chi che aon na bela colaborazion e a chi che va nose sentù detelpai. Na colaborazion emportanta l'aon ence con la scoles de schi de val. I maestres moscia gran sensibilità percheche i renunzia a na pèrt de ores da profesionisè, che dèsc segur più vadagn, per se dèr jù con nesc joegn."

Co siede bogn de gestir la sacotanta disciplines tel chèder di sport da d'invern?

"Da n pèr de egn aon metù a jir n raport de colaborazion con la Monti Pallidi: per chel che vèrda l paslonch aon maestres che enseña i fondamenc de la disciplina ma te chela che scomenza a doventèr na costion agonistica, per na miore gestion di atlec e ence per na costion economica, aon dezidù che sie la Monti a se cruzièr de chest setor. L'è na cernuda che fêsc sparagnèr scioldi e ressorses a duta does la sozietèdes. Valif se fajea ence con la brea ma per motives de numeres se à dezidù de renunzièr. Tel davegnir amò ge volarà rejonèr ence coi genitores su la direzion che cogn tor la sociazion percheche sarà semper più senester arjonjer resultac e restèr competitiv, anter l'auter

chest comporta cosè maores. N'outa l Ski Team l'era l'ezelenza a livel regionel e provinzial, ades duc i schi club se à organisà e donca ge vel fêr cernudes sui obietives da se meter dant, ence se noscia filosofia l'è semper stat chela de n schi club tradizional, con l'obietif de l'agregazion en generel. N'autra forma de colaborazion l'è chela che vegn portèda inant col Ski College che su delega del Comitad Trentin se emprevèl apontin del sostegn del Ski Team per l schi, de la Monti per la brea e de la Dolomites per l paslonch e l saut."

Co è la stata l'esperienza de l'endrez di Mondiei Junior?

"L'è stat na esperienza maraveusa, ruèda a coronament del gran lurier portà inant ti egn passè per organisèr sacotanta garejèdes de Copa Europa con bon ejit e zacan la Fisi a recognosciù nose empegn e capacità. I Mondiei l'è stat na ocazion emportanta per duta la val, l'è stat na resposta massiva da pèrt de dut l compart e de chest no podon che esser contenc. Ma i Mondiei l'è stat ence l motif che ne à permetù de tegnir avert l'Aloch ajache l'è stat l risec concret che l'vegnissà serà. Chest fossa stat na perdita sprepotitèda per nose teritorie, assane perdù n portol fondamental per i alenament de noscia sozietèdes. Per poder fêr garejèdes l'è de besegn de portoes omologhe e no n'è n muie, l'Aloch è adatà a più situasions. Per chest resultat no feniron mai de reingrazièr l'empegn politich de l'ombolt de Sèn Jan Giulio Florian che, fosc ence a despet de pareres de contra daita da sia amministrazion, l'è scombatù fin junsom, desmostran na gran sensibilità envers chest portol. N' devalpai va segur ence a la sozietà Bufaure che l'è fat dalbon n muie per chest event en cont de ressorses umènes e finanzièles. Duta chesta realtà, Comun de Sèn Jan, Bufaure, Consorzie impianc portamont, maestres de schi, Apt, l gran numer de voluntaristiches de Ski Team e Monti Pallidi à contribui a chest resultat ezelent, n bon pont de partenza per se spetèr ades zeche de auter."

L Ski Team amò no l'è demò agonism...

"Ei, aon jà dit che la sociazion à metù a jir n muie de colaboracions sul teritorie. Endèna l cors lonch de schi chest an aon pissà che per ge ensegnèr ai bec coche ge vel se comportèr sa mont, che l'è n ambient da marevea ma che l sion ence sacotenc pericoi, a una coi Socors da Mont e la Polizia de Stat, che sobito à dat sia disponibilità, aon organisà n domesdi per rejonèr de respet, risec, ategiamenc drec e falè, levines e c.i. e l'è stat n bel suzess, coi bec che à responet con gaissa e atenzion. Dapodò l Ski Team via per l'istà l'endrez l'istà per i bec a Cianacel, l'è semper colaborà ence con Poza, ades chest an fazele meton en pe na atività de carater sportif per tre diis en setemèna, dedichèda ai bec più gregn, che no pel jir a l'istà per i bec percheche i è massa gregn opura che no i vel aer n empegn duta la setemèna, rencurèda da profesionisè; ben segur cognaron fêr i conc coi numeres."

Ge dijon n gran devalpai al president Bernard per sia disponibilità e ge auguron n bon lurier.

Intervista de
Cristina Marchetti



Una de la ativitèdes che l Ski Team à portà inant chest an extra l'agonism l'è stat chela coi Socors da Mont e la Polizia de Stat.